

საქართველოს გარემოსა და ბუნებრივი რესურსების დაცვის მინისტრის

ბრძანება №126

1996 წლის 5 სექტემბერი

ქ. თბილისი

საქართველოში ელექტროშოკის აპარატურის თევზის საჭერად გამოყენების აკრძალვის შესახებ

ზღვის ეკოლოგიისა და თევზის მეურნეობის სამეცნიერო-კვლევითი ინსტიტუტის, საქართველოს მეცნიერებათა აკადემიის ზოოლოგიის ინსტიტუტის, საზღვაო ასოციაცია „პოსეიდონისა“ და სხვა დაინტერესებული ორგანიზაციების მიერ ჩატარებული კვლევის შედეგად მიღებული მასალები ნათელიყოფენ ელექტროშოკის აპარატურის თევზსაჭერად გამოყენების არამიზანშეწონილობას, ვინაიდან ხშირ შემთხვევაში მას მოსდევს თევზის ტრამვირება, მისი დაზიანება და დაღუპვა. ელექტროდენის მოქმედების არეალში ხვდება ყველა ასაკისა და ზომის თევზი. მდგომარეობას ართულებს ის გარემოებაც, რომ საქართველოში მასიური ხასიათი მიიღო კუსტარული წესით დამზადებული ელექტროშოკის აპარატურის გამოყენებამ, რომელთა ელექტრული პარამეტრები ნორმებს აღემატება, რაც კიდევ უფრო ზრდის თევზის დაღუპვის შესაძლებლობებს.

გარდა აღნიშნულისა, დღემდე არ არის ცნობილი ელექტროშოკის ზეგავლენა სხვა ბიონტებზე, უხერხემლო ცხოველებზე და ფლორაზე, რომლებიც თევზის ძირითად საკვებ ბაზას წარმოადგენენ: არ არის დამუშავებული აღნიშნული აგრეგატებით მუშაობისას უსაფრთხოების ტექნიკა და სხვა.

გამომდინარე ზემოაღნიშნულიდან ვბრძანებ:

1. აკრძალოს საქართველოს მთელ ტერიტორიაზე ბუნებრივ წყალსატევებში ელექტროშოკის აპარატურის გამოყენება სამრეწველო თევზჭერის მიზნით, საქართველოს იუსტიციის სამინისტროში ამ ბრძანების რეგისტრაციის დღიდან. ელექტროშოკის აპარატის გამოყენება, როგორც გამონაკლისი, შესაძლებლად ჩაითვალოს მხოლოდ სატბორე თევზის მეურნეობაში, ხოლო აუცილებლობის შემთხვევაში ბუნებრივ წყალსატევებზე სამეცნიერო-კვლევითი და სამედიცინო მიზნით, გარემოსა და ბუნებრივი რესურსების დაცვის სამინისტროს სპეციალური ნებართვის საფუძველზე.
2. ზღვის ეკოლოგიისა და თევზის მეურნეობის სამეცნიერო-კვლევითმა ინსტიტუტმა (ბ-ნი ა.კომახიძე) 1996 წლის 31 დეკემბრამდე წარმოადგინოს დასკვნა ელექტრო ველის ზემოქმედების შესახებ წყლის სხვა ბიონტებზე (უხერხემლო ცხოველებზე და ფლორაზე), რომლებიც თევზის საკვებს წარმოადგენენ.
3. გარემოსა და ბუნებრივი რესურსების დაცვის რეგიონალურმა (საქალაქო) სამმართველოებმა გააძლიერონ კონტროლი ელექტრო შოკის აპარატურის ბუნებრივ წყალსატევებში და წყალსაცავებში თევზსაჭერად გამოყენების ფაქტების გამოვლენისა და აკრძალვის მიზნით.
4. ეთხოვოს შსს ეკოპოლიციის მთავარ სამმართველოს (ბ-ნ ო.ფოფხაძეს) მის დაქვემდებარებაში მყოფ სამსახურებამდე დაიყვანოს ეს ბრძანება და გააძლიეროს მუშაობა ელექტრო შოკის აპარატურის ბუნებრივ წყალსატევებში გამოყენების ძირეულად აღკვეთის უზრუნველსაყოფად.
5. კონტროლი აღნიშნული ბრძანების შესრულებაზე დაევალოს საქართველოს გარემოსა და ბუნებრივი რესურსების დაცვის მინისტრის პირველ მოადგილეს ბ-ნ ზ.თავართქილაძეს.

ბ. ჩხობაძე

